



張國彥

出生：民國七年生

學歷：國立四川大學畢、中國地政研究所畢

現職：退休

曾發表之作品：大陸曾刊行短笛無腔集，其他著作與詩無關，詩亦曾零星發表。

獲獎紀錄：曾獲教育部文藝創作獎第二名、佳作等

古典詩 第二名 不著齋吟草

創作理念

一、七古一首（八十二年）

年來晨運，得識壽達百齡范澤老，接席傾談，無任欽遲！澤老曾名揚軍、政、財、經等各界，詠而贈之，藉示敬佩耳。

二、絕句六首

（一）送別一首（八十六年）

丁丑四月，適詩友王兄赴美定居，設酒歡敘後，至公園池邊分手，道旁楊柳依依，當即口占一首。

（二）喜遷新宅五首（八十七年）

戊寅秋，經友人介紹，傾囊另加借貸，購一蝸廬，聊避風雨。惟長期負債，苦不堪言，感而賦此。

三、律詩十九首

（一）詠落花十首（八十九年）

庚辰春，購得坊間明唐寅落花詩冊三十首，至感興趣。讀後，一時技癢，乃搜索枯腸，亦詠落花詩二十首。（錄其中十首）

（二）元旦感懷四首（九十年）

辛巳元旦，晨起細雨霏霏，頗有寒意。計來台至今已達五十餘年，流光如駛，垂垂老矣，能無慨然！

（三）八五閒吟五首（九十一年）

歲次壬午，余已達八五高齡，滄桑歷盡，祇合煮酒閒吟，安慶餘年。

四、詞四闋（時間不同，理念各異）

詞四闋，乃當時即興之作，意義明顯，創作理念，一目了然。讀之，當可心會。

不著齋吟草

七古一首

贈范澤老

期頤俠義一高人，接席傾談滿室春。坦蕩胸懷如日月，晶瑩光潔了無塵。天資幼小聰明甚，弱冠才華邁等倫，壯歲名揚軍政教，幾番禦敵幸身存，從政廉能包孝肅，公忠體國復憂民！詎知樹大招風折，觸怒權奸仇暗結，入罪曾蒙不白冤，多年困擾難昭雪；固窮苦況似黔婁，家有猗蘭香益烈！中原板蕩無奈何，傷心梓里匆匆別，倉皇攜眷到逢瀛，仁懷濟世心尤切。閒居恬逸貌溫文，飽讀詩書又博聞，塵事茫茫都看破，功名富貴等浮雲，平時品茗閒吟詠，隱市參禪修德勤。也置義田贍氏族，孳孳爲善助人群，憂樂都關天下事，真傳一脈范希文！

絕句六首

(一) 送別

芳草照斜暉，流鶯繞樹飛，
池邊揮手去，楊柳更依依！

(二) 喜遷新宅

其一

傾囊選購一蝸廬，檢點遷搬久蝕書，
從此棲身欣有處，康寧福壽樂安居。

其二

卅年蹭蹬早無車，長鋏歸來幸有魚，
斗室尚能容坐臥，當隨董遇讀三餘。

其三

平生壯志盡磨消，閒日敲詩慰寂寥。
環堵於今凝鐵骨，不愁風雨肆狂飆！

其四

爲欲身心享太平，詩書有味足怡情，
閉門世事都休問，任爾豺狼更縱橫！

其五

傷時浪跡感泥蟠，世道衰微劇可嘆。
酒罷茶餘煙足後，怡然高臥效陳搏。

三、律詩十九首

(一) 詠落花

其一

無情風雨太猖狂，毀盡嬌容劫盡香！
燕子樓頭摧艷色，石家園裡墜紅妝；
馬嵬枯謝空垂淚，垓下凋殘枉斷腸！
昔日榮華皆夢幻，於今淪喪祇堪傷！

其二

一從飄泊出芳庭，行色匆匆步未停。
影瘦難支淒冷夜，心傷易碎短長亭；
楚臺別淚原含血，漢殿投淵欲化萍。
鵲泣鶯啼春已暮，隨風起伏入沙汀。

其三

總爲春歸倍感傷，名園芳苑盡荒涼！
紅銷有幾飄茵席？香斷何多卸粉妝；
無奈枯殘逢雨驟，那堪憔悴遇風狂！
狠心最是栽花者，萎謝都將棄道旁！

其四

嬌顏媚態任人誇，轉瞬蹉跎感歲華！
灞水橋邊飄若雪，桃花源裡墮餘霞；
荒郊委頓徒悲嘆，歧路悽惶祇怨嗟。
紫陌芳阡留悴影，綠楊古渡亂如麻！

其五

夜來搖落滿琴床，舊日風流遽渺茫。
潘子縣中埋去路，四娘畦畔剩殘香；
無家祇合依荒草，掩淚何堪對夕陽！
最是芳園新雨後，縱橫狼藉斷人腸！

其六

日來憔悴減容光，半爲傷春半自傷。
已恨鶯捎拋斷岸，豈甘燕蹴拂危牆。
支離野店無人惜，潦倒荒村更自傷！
杜宇空枝啼不住，悄無人處卸殘粧。

其七

階前無語度春宵，庭院深深倍寂寥。
滿地殘紅愁不解，一天細雨怨難消！
祇期有月飛香閣，最怕隨風過險橋。
雨劫香銷嗟命薄，傷心無助任淪漂！

其八

當年曾記蝶相親，百媚千嬌簇簇新。
喜上高樓陪淑女，怕臨荒野混污塵；
滿腔積憤憑誰訴，萬里投荒祇自珍！
節序推移遭棄置，低徊往事倍傷神！

其九

鷓鴣聲裡喚春深，陣陣飛紅亂上林。
自有佳人收艷骨，從無俗子得芳心；
風前婉轉身難定，月下徬徨影易沉。
如許清才又嬌俏，塵寰何處覓知音！

其十

紅銷白墮雨綿綿，流落孤城古道邊。
纔別娉婷年十八，翻愁漂泊路三千；
嬌痴都被僮夫誤，高潔偏多隱士憐，
但願香閨妝案上，明春依舊續前緣！

(二) 元旦感懷

其一

序屬元回氣象新，蹉跎又是一年春。
此間有樂常忘蜀，他日何時可滅秦？
瀛海流人悲落泊，中原黎庶苦沉淪。
愴懷萬物皆芻狗，天地云胡總不仁！

其二

也曾滄海釣鰲鯨，骨鯁疏枉誤一生。
戡影早經輕富貴，垂綸原已棄尊榮；

泥蟠空負凌雲志，膝折難甘伏櫪情。
尚有龍泉藏匣裡，傷時猶作不平鳴！

其三

思鄉不寐又更殘，何處笙歌舞正酣？
恥向隴頭爭苦李，愧無巨手挽狂瀾！
心能得趣居常樂，事到猜疑辯亦難。
亂世艱辛都歷盡，年來最怕夢江南！

其四

退休遁跡早離群，厭見繁華車馬紛。
隱姓已甘名沒沒，暢懷惟有酒醺醺；
侵晨每羨凌霄鳥，向晚欣看出岫雲。
日後優遊無定處，合當俗世斷知聞！

(三) 八五閒吟

其一

八五年前甫墜塵，蓬瀛倏又度生辰。
散樗遭棄偏長壽，老友相逢卻更親。
滄海橫流瀕末世，關山險隔阻歸人！
一徒休致無牽累，贏得閒雲野鶴身！

其二

邯鄲旅邸煮黃梁，羨煞盧生夢一場。
得福安知因失馬？補牢豈救已亡羊？
送窮乏術同韓愈，擊暴無方愧子房！
十丈軟紅都悟徹，閒居祇合學蒙莊！

其三

南來避寇倍酸辛，搔首頻驚鶴髮新。
 祇合修身還向道，不須憤世復傷春；
 耽吟祇羨香山麓，歸隱難尋渭水濱。
 恥作權門長揖客，卓然風骨自嶙峋！

其四

飄零海嶠度春秋，歷盡滄桑苦樂愁！
 憶昔青絲猶滿鬢，於今白髮已盈頭；
 利名畢竟殊難得，富貴從來不易求。
 試看紘紘熙攘者，誰人肯在死前休！

其五

侵曉醒來起最先，新鶯啼破一林煙。
 長吟每在微醺後，導引常當欲睡前；
 閒讀詩書饒逸趣，飢貪飲饌特甘鮮。
 健行慢步登山樂，依舊豪情似少年！

詞四闋

(一) 雨中花 詠柳

媚眼凝青，遊絲軟繫，嬌痴尚未成陰；看拂煙憨態，如許輕盈！婉轉樓頭灑
 上，依依慣惹離情！豈奈隨風無力，纖腰綠鬢，帶雨難禁。相逢同是天涯淪
 落，者番聚首堪憑；當此際好花時節，喜印芳心。莫待春光老去，空嗟零絮消
 沉！多情應念，高山流水，惟我知音！

(二) 清平樂 暮春

粼粼水皺，嬈嬈池邊柳；總爲多情人易瘦，況是春歸時候！愁深且掩重門，最

難耐處黃昏；寂寞雲山望斷，相思空惹啼痕！

(三) 水龍吟 感懷敬步友佛兄原韻

淒涼夢遠天遙，床頭按劍曾長嘯！依稀往事，何堪回首，強爲歡笑；寂寞窗前，辛酸一把，空嗟年少。喜壯懷未泯，雄心猶在，無人識，最傷悼！腸斷王孫落拓，全忠祇恨難全孝；漂萍遊子，白雲親舍，春暉望報。峭直如君，風流似我，自憐誰告。待山河重整，盈樽有酒，五湖同棹。

(四) 陌上花 別情

含情細語，相憐默默，正斜陽晚。密約叮嚀，一片痴情愜款。者番踏上迢迢路，恨煞夢遙天遠！祇青衫濕透，小園春老，流年偷換。忍凝眸，滿院飛紅點點，一任悄隨風散。無限愁思，寂寞傷心誰伴！樓空鳳去增惆悵，何況頽垣荒館！最淒涼，驀見西山殘月，幾回腸斷！